

St. Fidelis

25. Vnnd nachdem Einer Auß vorgeschlagen beed[en] Armen Jungen Vättern dises Allmuesen Gestüfft wurde vff gesteckhte Zeit genoßen oder Auß obangedeuten Vrsachen kheiner under Inen solches angetreten haben, Sollen fürs Drey vnd Zwainzigst die H[erren] Executores schuldig sein, solches ein Jahr zuuor meines geliebten Schwag[er]s Seelig[en] Daniel Küchers hinderlaßnen Ehlichen Söhn Alher nach[er] Freyburg Im Breyßgaw zue denuncieren vnd zue wissen machen vnd vff Ihr begeren Einen Auß beeden mit vorbemeltem Reuers zue conferiern und zue geb[en]. Vnnd da sie solches nicht würden begern od[er] entzwischen Absterben, so Ist mein vleyßig begern vnnd Letster Will (mich hiemit Aller Gerechtsame In Ewigkhait verzeihendt vnnd den Herrn Executorn [Alles] Vollmächtigst hinfüro vbergebende), solche Stüftung vnder mehrbesagtem Reuers deß Erbetens Mit-Executors Bartlin Baunwarths ehliche Sohn Jacoben (fahls er begern solte) zue conferien vnnd zue geb[en].

26. Sodan vnnd fürs Letst verschaffe vnnd verordne Ich, da meines pliebenen Brued[er]s Carlin Roye Seelig[en] hinderlaßnes Ehliches einigs Döchterlin N. zue mannbaren Jahren vnd gewißen Standt gelangen, das Alsdan Ime von dem erst vacirend[en] Jahr (namblich d[er] fürfallend[en] resigna[ti]on) *das ganzze* Järliche Gefell volkh[ommenlich] gegeben werde.

Vnnd zue bestettigung vnnd bekhrefftigung hieuer von mir mit Aignen Handen beschribner meiner Marci Roye [D[octoris]] disposition, Item vnnd dan weiters zue glaubwürdig[em] Zeugnuß vnnd Vrkhundt, Auch genuegsamer Confirmation vnnd bestettigung dises Allmuesen-Gestüffts, so meinem Geschlecht vnnd nechsten Armen Bluetsgesipt-Verwandten vnnd andern Armen Scholaren der Graffschafft Sigmaringen zue guettem, Inmassen hieuer geschriben steht, von mir vffgericht vnnd angeordnet worden vnnd das demselben (hindangesetzt alles Zweiffels, Disputierens, gloßierens oder difficultierens), Also In Allen vnnd Jeden puncten getrewlich, erbarlich vnnd würckhlichen ohne Alle v[er]hinderung gänzlich gelebt vnd volzogen werden solle, hab Ich mein gewohntes Insigell od[er] Pittschafft zue End Auffgetruckht vnd mich aigner Handen vnderscriben. Vnnd haben noch mehrer Sole[m]nitet und zeugnuß halben dise Endtbenandte (Jedoch Inen vnd den Irigen In Allweg ohne nachthail vnd schaden) sich gleichmäßig uff mein Vnder[thänigs] vnd Dienst[lissiges] Ansinnen vnderscriben vnnd vnd[er]zeichnet. Beschehen vnnd geben Montag den 19. tags Monats Septembris, Als man Zahlt nach Christi vsers Lieb[en] Herren vnnd seeligmachers geburt Sechzehnhundert Dreyzehen Jahr [etc.] Zue Freyburg Im Breyßgaw

M[anu] P[ropria] [= eigenhändig]

Marcus Roye Beeder Recht[en] Doctor  
von Sigmaring[en]-Statt  
Anieczo Aber  
F[rater] Fidelis vnw[irdiger ...]

Joann Wilhalm Von  
Stotzingen zu Tischingen  
Vnd Hewdorf [manu propria]

Dauid Schmidlin Von  
Freyburg Im Preyßgaw

Christophor[us] Roye,  
dieser Zeit Caplon auff  
dem hohen stiftt Basel

Joannes Theobaldus Mayer  
Gebweilerensis M[anu prop]ria

Hieronymus Schüßler  
eiusdem Ecc[lesi]ae  
Cathed[ralis]  
Basiliens[is]  
Capellan[us] [manu prop]ria

M[agister] Thomas Mauch heinstettensis

M[agister] Joannes  
Jacobus Schmidlin  
Friburgensis  
Brig[oviensis]